

Na osnovu člana 57. Zakona o zaštiti ličnih podataka („Službeni glasnik BiH“, broj: 12/25), člana 71. i člana 125. Statuta Općine Vogošća („Službene novine Kantona Sarajevo“, broj: 27/14 – Prečišćeni tekst, 14/15, 9/20 i 23/24) Općinski načelnik d o n o s i

O D L U K U

o uspostavi i korištenju videonadzora i pravilima obrade ličnih podataka prikupljenih putem videonadzora u zgradi Općine Vogošća

I – OPĆE ODREDBE

Član 1. (Predmet Odluke)

Odlukom o uspostavi i korištenju videonadzora i pravilima obrade ličnih podataka prikupljenih putem videonadzora u zgradi Općine Vogošća (u daljem tekstu: Odluka), u cilju poštivanja prava na privatnost i zaštitu ličnih podataka nosilaca podataka, utvrđuje se uspostava, korištenje i upravljanje videonadzora u zgradi Općine Vogošća (u daljem tekstu: Općina), svrha videonadzora, lokacije postavljanja kamera, način obrade i zaštite ličnih podataka prikupljenih putem videonadzora, prava lica čiji se podaci obrađuju, rokovi čuvanja snimaka, kao i nadzor nad zakonitošću obrade ličnih podataka.

Član 2. (Pravni osnov)

Videonadzor u Općini uspostavlja se i provodi u skladu sa odredbama Zakona o zaštiti ličnih podataka, kao i drugim važećim propisima koji uređuju zaštitu ličnih podataka i sigurnost imovine i lica.

Član 3. (Definicije)

U smislu ove Odluke pojedini pojmovi imaju sljedeće značenje:

- a) „videonadzor“ je informaciono – komunikacioni sistem koji ima mogućnost prikupljanja i daljnje obrade ličnih podataka, koji obuhvata stvaranje snimka koji čini ili je namijenjen da čini dio sistema skladištenja;
- b) „lični podatak“ je svaki podatak koji se odnosi na fizičko lice čiji je identitet utvrđen ili se može utvrditi;
- c) „obrada“ je svaki postupak ili skup postupaka koji se obavlja na ličnim podacima ili na skupovima ličnih podataka, automatiziranim ili neautomatiziranim sredstvima, kao što su: prikupljanje, evidentiranje, organizacija, strukturiranje, čuvanje, prilagođavanje ili izmjena, pronalaženje, ostvarivanje uvida, upotreba, otkrivanje prijenosom, širenjem ili stavljanjem na raspolaganje na drugi način, usklađivanje ili kombiniranje, ograničenje, brisanje ili uništavanje;
- d) „kontrolor podataka“ je fizičko ili pravno lice, javni organ ili nadležni organ koji samostalno ili s drugim određuje svrhe i sredstva obrade ličnih podataka. Kada su svrhe i sredstva takve obrade utvrđeni zakonom, kontrolor podataka ili posebni kriteriji za njegovo imenovanje propisuju se zakonom.

II – SVRHA USPOSTAVE VIDEONADZORA

Član 4. (Svrha videonadzora)

Videonadzor u Općini uspostavlja se radi zaštite uposlenih lica i imovine Općine i svih drugih lica koji dolaze u službene prostorije Općine, sprečavanja i otkrivanja nezakonitih radnji, kontrole pristupa službenim prostorijama, osiguranja sigurnog i nesmetanog rada općinskih službi, te dokumentovanja eventualnih sigurnosnih incidenata.

Videonadzor se ne smije koristiti u svrhe koje nisu u skladu sa ovom Odlukom i važećim propisima o zaštiti ličnih podataka.

III – OBRADA LIČNIH PODATAKA PRIKUPLJENIH PUTEM VIDEONADZORA

Član 5. (Obrada ličnih podataka prikupljenih putem videonadzora)

Obrada ličnih podataka prikupljenih putem videonadzora vrši se u skladu sa odredbama Zakona o zaštiti ličnih podataka i odredbama ove Odluke.

Obrada ličnih podataka prikupljenih putem videonadzora obuhvata prikupljanje, evidentiranje, snimanje, pohranjivanje, uvid, korištenje i brisanje snimaka nastalih putem videonadzora.

Lični podaci prikupljeni putem videonadzora mogu se obrađivati isključivo u svrhe utvrđene članom 4. ove Odluke i u obimu koji je nužan za ostvarivanje tih svrha.

Pristup snimcima i obrada ličnih podataka dozvoljeni su samo ovlaštenim licima, uz primjenu odgovarajućih tehničkih i organizacionih mjera zaštite ličnih podataka.

Lični podaci prikupljeni putem videonadzora ne smiju se koristiti u druge svrhe niti se smiju neovlašteno otkrivati trećim licima, osim u slučajevima propisanim zakonom.

Član 6. (Kontrolor obrade podataka)

Kontrolor obrade ličnih podataka prikupljenih putem videonadzora je Općina.

Za upravljanje videonadzorom zadužuje se Stručna služba za zajedničke poslove i poslove mjesnih zajednica Općine Vogošća, kao i ovlašteno lice koje imenuje Općinski načelnik posebnim rješenjem.

IV – LOKACIJE VIDEONADZORA

Član 7. (Mjesta postavljanja kamera)

Videonadzorom mogu se obuhvatiti samo prostori čiji je nadzor nužan radi postizanja svrhe utvrđene članom 4. ove Odluke.

Videonadzor može biti postavljen na ulazima i izlazima iz zgrade Općine, u hodnicima i zajedničkim prostorijama, u prostorima za prijem stranaka, prostorima ispred objekta u vlasništvu ili korištenju Općine, parking prostorima koji pripadaju Općini, te drugim lokacijama za koje se procijeni da je videonadzor potreban radi sigurnosti.

Videonadzor nije dozvoljen u prostorijama u kojima bi se narušilo pravo na privatnost, poput kancelarija, sala za sastanke, u bifeu, te u sanitarnim prostorijama.

V – OBAVJEŠTENJE O VIDEONADZORU

Član 8. (Označavanje prostora)

Prostori koji su pokriveni videonadzorom moraju biti jasno označeni vidljivim obavještenjem koje sadrži sljedeće informacije: da je prostor pod videonadzorom, podatke o kontroloru podataka, odnosno obrađivaču, svrhu videonadzora i kontakt podatke za ostvarivanje prava u vezi sa zaštitom ličnih podataka.

VI – PRISTUP I OBRADA SNIMAKA

Član 9. (Pristup snimcima)

Pristup snimcima videonadzora imaju ovlaštena lica koja imenuje Općinski načelnik.

Ovlaštena lica dužna su:

- postupati u skladu sa propisima o zaštiti ličnih podataka,
- čuvati povjerljivost snimljenih podataka,
- koristiti snimke isključivo u svrhe utvrđene ovom Odlukom.

Član 10. (Dostavljanje snimaka)

Snimci videonadzora mogu se dostaviti nadležnim organima na osnovu njihovog pisanog zahtjeva i u skladu sa važećim propisima.

VII – ROK ČUVANJA SNIMAKA

Član 11. (Period čuvanja)

Snimci prikupljeni putem videonadzora čuvaju se najduže 30 dana, osim ako su potrebni kao dokaz u postupku pred nadležnim organima, u kojem slučaju se mogu čuvati do okončanja postupka.

Nakon isteka roka snimci se automatski brišu ili trajno uništavaju.

VIII – ZAŠTITA PODATAKA

Član 12. (Sigurnosne mjere)

Općina je dužna osigurati odgovarajuće tehničke i organizacione mjere zaštite ličnih podataka prikupljenih putem videonadzora kako bi se spriječio neovlašten pristup, zloupotreba ili gubitak podataka.

IX – PRAVA ISPITANIKA

Član 13. (Prava lica čiji se podaci obrađuju)

Svako lice čiji su lični podaci prikupljeni putem videonadzora ima pravo da od kontrolora podataka zatraži informacije o obradi svojih ličnih podataka; zatraži pristup snimku u kojem se pojavljuju, u skladu sa zakonom; podnijeti prigovor nadležnom organu za zaštitu ličnih podataka.

X – NADZOR NAD PROVOĐENJEM ODLUKE

Član. 14 (Nadzor)

Nadzor nad provođenjem ove Odluke vrši službenik za zaštitu ličnih podataka.

XI – ZAVRŠNE ODREDBE

Član 15. (Stupanje na snagu)

Ova Odluka stupa na snagu danom donošenja, a objavit će se na oglasnoj ploči i službenoj web stranici Općine.

Broj: 02-02-465/26
Vogošća, 16.03.2026. godine

OPĆINSKI NAČELNIK

Migdad Hasanović

DOSTAVLJENI AKT JE ISTOVJETAN ORIGINALU KOJI SE NALAZI U SPISU PREDMETA.